



Čoaggananrohkosat

Čoaggananrohkosat lohka mielliturga dahje olles searvegoddi. Go suddovddastus lea čoaggananrohkosat oasis, de mielliturga lohka čoaggananrohkosat, ja searvegoddi fas suddovddastusa.

1

ML | Ipmil, mii leat bohtán du bassi vissui váldit vuostá dan maid don áiggut midjiide addit. Rabas dál min váimmu ja ođasmahte min oskku.

2.

ML | Bassi Ipmil, mii leat čoagganan du muođuid ovdii nannejuvvot du ráhkisvuhtii ja duohtavuhtii. Deavddášit min Vuoiŋnainat ja rabašit min váimmu du attáldagaide. Divttášit sánat ruohtasmuvvat min váibmui, vai Kristus eallá min siste, ja mii šaddat oktan du siste ja bálvalit du álelassii.

3.

ML | Buorre Ipmil, guhte attát eallima buot heakkalaččaide, mii máidnut du eatnama čábbodaga dihtii, ja go beassat muosáhit du buorrevuoda. Dás du muođuid ovddas mii rohkadallat: Atte midjiide guldaleaddji beljiid, giitevaš váimmu ja veahkkás giedaid, vai mii gulašeimmet du sáni, máinnošeimmet du du buorrevuoda dihtii, ja sániiguin ja daguiguin duođaštivččiimet du stuorra daguid.

4.

ML | Herra, mun lean bohtán dása du bassi vissui vuostáiváldit dan maid don Ipmil Áhčči, mu sidnideaddji, don Herra Jesus, mu beasti, don bassi Vuoiŋna, mu jedđejeaddji eallimis ja jápmimis, áiggut munnje addit. Rabas dál mu váimmu bassi Vuoiŋnat bokte, vai mun oahpašin gáhtat sudduidan, oskkošin du árbmui ja oppa du álbmogiin beaivválaččat ođasmuvašin duohta ja bassi eallimii.

5.

ML | Ipmil, don leat gasku min gaskkas.

Buo | Ipmil, don leat gasku min gaskkas.

ML | Don birastahtát min ollásit.

Buo | Don birastahtát min ollásit

ML | Doala min du giedastat.

Buo | Doala min du giedastat.

6.

Dát čoaggananrohkos sisttisoallá suddovddastusa, ja danin oažžu guođđit suddovddastusa eará oasis ipmilbálvalusas.

Rohkosa lávlot vurrolaga liturga, mielliturga (ovdalávlu) ja searvegoddi.

L | Oskkáldas Ipmil, don attát midjiide ođđa eallima bassi gásttas. Gásttas mii merkejuvvot bassi ruossa mearkkain vai mii gullat dutnje.

ML | Mii leat du mánát. Ođasmahtášit dál min oskku ja min ráhkisvuođa.

Liturga goive giedain čázi golmma geardde gástalihtis, nugo gásttas dahkko.

L | Ipmilan, du lohpadusat čuvget dego arvedávgi, – du lihtu mearka buot sivdnádusaide.

ML | Mii giitit du ja máidnut du.

S | **Mii giitit du ja máidnut du.**

ML | Don leat min doaivu.

S | **Don leat min doaivu.**

L | Don dovddat min eallima. Ii mihkkege leat dutnje čihkosis.

ML | Mii leat dahkan du dáhtu vuostái, mii rihkkut du báhkomiid.

S | **Mii leat dahkan du dáhtu vuostái, mii rihkkut du báhkomiid.**

ML | Ipmilan, atte ándagassii.

S | **Ipmilan, atte ándagassii.**

L | Don bajásčuoččáldahttet Jesusa hávddis. Gásttas mii ge čuoččáldahttojuvvot ođđa eallimii suinna.

ML | Ipmilan, du lohpadusat čuvget dego arvedávgi,

S | **Ipmilan, du lohpadusat čuvget dego arvedávgi**

ML | – du lihtu mearka buot sivdnádusaide.

S | – **du lihtu mearka buot sivdnádusaide.**

Ipmilan, du lohpadusat čuvget dego arvedávgi, – du lihtu mearka buot sivdnádusaide

7.

Dát rohkos heive earenoamážit ipmilbálvalusain gos leat ollu mánát. Mánnajoavku sáhtta čuožžut searvegotti ovddas ja čájehit mearkkaid. Searvegoddelahtut geat háliidit, sáhttet dahkat giehtalihkastagaid mánáiguin searvágaid.

Bajiduvvon giedat

ML/L | Ráhkis Ipmil, don leat min luhtte. Cahkket čuovggat min siste.

Giedat ruossalassii rattis

ML/L | Ráhkis Jesus, don vádjolat minguin. Divtte min eallit du ráfis.

Giedat vuostálagaid ratti ovddas, suorbmageažit bajás

ML/L | Ráhkis Ipmil, don oainnát min. Gulašit min jurdagiid ja jaskes rohkosiid.

Giedat geigejuvvoon goapmirat bajás

ML/L | Ráhkis Jesus, don doalat min giedaid iežat giedain. Láide min du buori geainnu mielde.

Mii dollet gihtii dan gii čohkká min bálddas

ML/L | Buorre Bassi Vuoigŋa, giitu go mii eat leat okto. Veahket min oaidnit guhtet guimmiideamet ráhkisvuodain.

8.

ML | Bassi Ipmil, don guhte leat addán midjiide eallima:

Giitu go válddát min vuostái gásttas ja nannet min eahkedismállásiin. Láide min sániinat ja rabas min váimmu du attáldagaide.

9.

Čoaggananrohkosat main lađas rievdá girkojagi mielde

Adveantaáigi

Mii vuordit Jesus Kristusa.

Son bohtá ja jávkada seavdnjadasa fámu.

(1)

Ipmil, mii leat bohtán du bassi vissui váldit vuostá dan maid don dáhtut addit midjiide.

Mii vuordit Jesus Kristusa.

Son bohtá ja jávkada seavdnjadasa fámu. Mii rohkadallat: Rabas dál min váimmu, vai min oskku ođasmuvvá.

(2)

Bassi Ipmil, mii leat čoagganan du muođuid ovdii oahppat dovdat du ráhkisvuođa ja duohtavuođa.

Mii vuordit Jesus Kristusa.

Son bohtá ja jávkada seavdnjadasa fámu.

Mii rohkadallat: Sáddešit du Vuoigŋa ja attášit midjiide rabas miela váldit vuostá du attáldagaid. Váre du sátni ruohtasmuvašii min váibmui, vai Kristus eallá min siste, ja mii šaddat oktan duinna ja bálvalit aivvefal du.

(3)

Buorre Ipmil,

Mii vuordit Jesus Kristusa.

Son boahtá ja jávkada seavdnjadasa fámu.

Du muođuid ovddas mii rohkadallat: Attážit midjiide guldaleaddji beljiid, giitevaš váimmu ja veahkkás giedaid, vai mii gullat du sáni, máidnut du buorre vuoda, ja sániiguin ja daguiguin duođaštít du stuorra daguid.

Juovlaáigi

Juovlaruohtta

Don addet midjiide mánáža kruppás dan bassi ija go engelat lávlo bestojumi ja ráfi eatnama alde.

Juovlabeaivi

Don diktet Sáni šaddat olmmožin ja ássagoahit min gaskii go Kristus, min beasti, riegádii.

Ođđajagi beaivi

Don attát bestojumi ja ráfi Jesusa nammii ja leat min mielde ođđa jagis.

Almmustusáigi

Kristusis mii oaidnit du hearvávuođa.

Son lea máilmmi čuovga mii báitá buot álbmogiidda.

Fástoáigi

Čuovvut Jesusa

Don leat rávkan min čuovvut Jesusa,

su guhte gudii buot mii lei iežas ja válddii bálvaleaddji hámi bálvolit du.

Pašuvdna

Don leat addán midjiide Jesusa guhte addá bestojumi ja ráfi. Su jápmin addá eallima ja soabaha min sudduid.

Márjjabeaivi

Don norddastit ráđdejeddjiid sin truovnnuin ja alidit vuollegaččaid. Mii giitit du Maria ovddas guhte riegádahtii máilmmi beasti.

Beassášáigi

Don bajásčuoččáldahttet Jesusa hávddis ja vuitet jápmima fámu.

Helloduorastat (Kristusa albmáimannanbeaivi)

Don alidit du Bártnát Jesus Kristusa ja bidjet su olgeš giedat beallái.

Hellodatbeaivvit

Don sáddejit dollanjuokčamiid máhttájeddjiid ala ja devdet sin Bassi Vuoiŋŋain.

Golmmaoktavuodaáigi – Dábálaš vuohki

*Don leat addán midjiide du riikkat Jesus Kristusis
ja rávkkat min Bassi Vuoiñainat oskui ja bálvalussii.*

Sivdnádusa beaivi

Don sáddet du Vuoiñat, ja sivdnidat eallima.

Don ođasmahtát sivdnádusa ja gallehat min buriid attáldagaiguin.

Olssot

Don sáddejit áirasiid

cegget ruossamearkka dáppe davvin.

Don diottát min oaidnit dan fámu mii ollašuvvá headjuvuodas.

Gáhtamuš- ja rohkosbeaivi

Don ándagassii attát min sudduid

ja rávkkat min beaivválaš jorgalussii.

Hállemasbassi (Buot bassi olbmuid beaivi)

Mii giitit du daid olbmuid ovdas geat leat sohtan dan buori soađi, ollašuhttán mátkki ja bisson oskkus.

Don leat bidjan midjiide agálaš mihttomeari iežat luhtte.

Hállemasbassi / Muitobeivi / Girkojagi mañemus sotnabeaivi

Don leat vuosttamuš ja mañimuš.

Du árbmu lea min doavvu ja min jeđđehus.

Konfirmašuvdna

Don válddát min vuostá gásttas ja leat min mielde buot beivviid.

Sámi álbmotbeaivi ja miessemánu 17. beaivi

Don leat rávkan buot máilmmi álbmogiid leat oktán ja eallit ráfis ja vuoiggalašvuodas.

Vuoiggalašvuoda ja ráfi ovdas / sotnabeaivi doarrádallojuvnon olbmuid / njukčamánu 8.b / miessemánu 1.b

Don leat sivdnidan buot olbmuid iežat gova mielde ja rávkkat min gáhttet olmmošárvvu.

10.

Báikkálaš hábmejuvnon čoaggananrohkosiid málle

Muhtin ipmilbálvalusaide sáhttet adnot eará čoaggananrohkosat go dat mat dás leat. Rohkosiid sáhtta váldit iešguđet gálduin, dahje sáhtta daid hábmet báikkálaččat.

1. Rohkos galgá čuovvut min girku oskku ja dovddastusa, ja das galgá leat liturgalaš ja poehtalaš bissovašvuolta

2. Rohkosa deataleamos oassi lea govvidit ahte mii leat ovttas Ipmila muođuid ovddas, searvivuohtan, ovttaskas olmmožin ja sivdnádusa oassin. Rohkos galgá čájehit vuordámuša ja ilu go mii oahppat Ipmila dovdat ipmilbálvalusas.
3. Čoaggananrohkos sáhtá deattuhit iešguđet lágan fáttáid, ovdamearkka dihtii:
 - Sotnabeaivi bajásčuožžileami beaivin
 - Jesus Kristusa lagašvuohta go mii čoagganit su nammii
 - Áibbašeapmi Ipmila vissui
 - Giitevašvuohta go Ipmil lea gávdnan ja vuostaiváldán min
 - Ipmila háldui bidjan
 - Gástamuittuhus
 - Rabasvuohta Sáni duddjomii min eallimis
 - Čoagganeapmi Sáni ja sakrameanttaid birra
 - Rávkojupmi jorgalussii ja čuovvuleapmái

11.

Čoaggananrohkos maŋŋil lihkuhisvuođaid ja roasuid

Go lihkuhisvuohta dahje roassu lea dáhpáhuvvan guovllus, riikkas dahje eará sajis máilmmis, de lea lunddolaš ahte dat gullo ja oidno válđoipmilbálvalusa álggaheamis. Dát berre dahkkojuvvot go lihkuhisvuohta dahje roassu lea dakkár ahte váikkuha olles searvegoddái, dahje ahte ođas dan birra lea beaggán ja searvegoddi danin ádde manin dát namuhuvvo. Go lihkuhisvuohta ja moraš guoská ovttas dahje moatti searvegoddelahttui, de lea lunddoleappo namahit dan searvegotti ovddasrohkosis.

Ovttas dahje eambo vuogas biibbalsániid sáhtá lohkat čoaggananrohkosa sajis, ovdamearkka dihte Sál 130,1-2; Sál 38,22-23; Sál 44,25-27; Sál 10,1.12b.14

Ovttas biibbalsániin dahje dan sadjai sáhtá rohkadallat heivvolaš rohkosa maid lea hábmen báikkálaččat dahje viežžat rohkosa dárogiel oasis *Sørgegudstjenesten, Bønnebok for Den norske kirke* (gč. rohkosiid nr. 144, 145, 146 ja 163) – dahje eará gálđuid geavahit.

Sálbmavearssat maid heivejit rohkosiin, nu go Sálbmagirji II:s nr 698 (Mus Ipmil ovddas lea bálvalus), nr 699 (Árgakristtalažžan áiggun eallit), dahje eará sálmmat oasis *Ruoktu ja bargu* nr 696-699, dahje oasis *Vihaheapmi girkolaš bálvalussii* nr 677-678. Dahje N13: 747, 749, 750, 751 ja 678.

Rohkosa sáhtá álggahit mottiin sániin lihkuhisvuođa dahje roasu birra. Jos biibbalsátni adnojuvvu, de sáhtá liturga cealkit:

L | Min iežamet sánit leat geahnoheamit go ipmirmeahtun deaivida. Danin mii geavahit Biibbala sániid min váidalusain ja rohkosiin:

Maŋŋil rohkosa sáhtá leat jaskatvuohta mii álggahuvvo ná:

L | Jaskkodehkot jurddašit ja rohkadallat.

Dan maŋŋil berre ipmilbálvalusa joatkit Kyrie eleisonain dahje heivvolaš kyrielitanijain.